

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 8/8

14 փետրվարի 2017թ.

Քննարկվեց «Տիգհար» ՍՊԸ գանգատը ՀՀ ԿԱ ՊԵԿ Արտաշատի ՏՀՏ 11.01.2017թ. թիվ 1011536 ակտի դեմ:

«Տիգհար» ՍՊԸ գանգատում բերված փաստարկները.

«Տիգհար» ՍՊԸ-ի գանգատը վերաբերվում է ՀՀ ԿԱ ՊԵԿ Արտաշատի ՏՀՏ 11.01.2017թ. N1011536 ակտի 6-րդ կետով արձանագրված խախտմանը: Գանգատաբերը գտնում է, որ հիշատակված որոշումները վերաբերվում են այն գազալիցքավորման կայաններին, որոնք նոր են տեղադրել բաշխիչ աշտարակներ: 28.08.2008թ. N1101-Ն տեխնիկական կանոնակարգով սահմանվել է, որ գործող ԱԳԼԾԿ-ներ շահագործող անձինք պարտավոր են մինչև 2011 թվականի ապրիլի 1-ը կառուցման և շահագործման պահանջները համապատասխանեցնել սույն տեխնիկական կանոնակարգով սահմանված պահանջներին, իսկ նոր կառուցվող ԱԳԼԾԿ-ների սեփականատերերը՝ սույն որոշումն ուժի մեջ մտնելու պահից: ԱԳԼԾԿ-ի կառուցումն ու շահագործումը թույլատրվում է միայն այն դեպքում, եթե դրանք համապատասխանում են ՀՀ օրենսդրության նորմատիվատեխնիկական փաստաթղթերի և սույն կանոնակարգով նախատեսված պահանջներին: Վերը նշվածից ակնհայտ է, որ «Տիգհար» ՍՊԸ-ն ունի շահագործման թույլտվություն և այն համապատասխանում է ՀՀ օրենսդրության նորմատիվատեխնիկական փաստաթղթերի և սույն կանոնակարգով նախատեսված պահանջներին: Հիշատակված որոշումներում նշված չէ, որ ընկերությունները, որոնք ունեցել են բաշխիչ աշտարակների ստուգաչափում չափագիտության ազգային ինստիտուտի կողմից, ունեն կապարակնքման սխեմա, սակայն նոր ստուգաչափում չեն անցել, ստուգաչափման վկայականները և կապարակնիքները համարվում են ուժը կորցրած:

«Տիգհար» ՍՊԸ-ն աշխատել է ՀՀ կառավարության 28.08.2008թ. N1101-Ն (Ավտոգազալիցքավորման ճնշակայանների (ԱԳԼԾԿ) կառուցման և շահագործման նվազագույն պահանջների տեխնիկական կանոնակարգը հաստատելու մասին) որոշմամբ հաստատված կանոնակարգի կետերի պահանջներով, ապահովել է բնական գազի կոմպրեսացված վառելիքի լիցքավորման համար օգտագործվող բոլոր համակարգերի և բաղադրիչների անվտանգությունը (դա նշանակում է, որ դրանք չեն եղել փոփոխված, հեռացված, փոխարինված կամ կորցրած իր սարքինությունը և աշխատել է վկայագրի ու նախագծի տեխնիկական բնութագրի համաձայն):

Այստեղ հարկ է անդրադառնալ ՀՀ էկոնոմիկայի նախարարի 10.05.2011թ. N298-Ն և ՀՀ կառավարությանն առընթեր պետական եկամուտների կոմիտեի նախագահի 19.05.2011թ. N772-Ն համատեղ հրամանով հաստատագրված ավտոգազալիցքավորման ճնշակայանների (ԱԳԼԾԿ) կապարակնքման կարգի 6-րդ և 12-րդ կետերի պահանջներին: Այսպես, 6-րդ կետի համաձայն՝ ԱԳԼԾԿ-ի գազաբաշխիչ կայանի, գազի հանգույցների և խողովակաշարերի վրա տեղադրված կապարակնիքները վնասված կամ հանված լինելու դեպքում, հարկային տեսչության և (կամ)

Չափագիտության ազգային ինստիտուտի ներկայացուցիչը կազմում են արձանագրություն՝ համաձայն Ձև 1-ի, իսկ 12-րդ կետի համաձայն՝ եթե Չափագիտության ազգային ինստիտուտի կողմից հայտնաբերվում են թերություններ, ապա այդ մասին գրավոր տեղյակ է պահվում հարկային տեսչությանը, եթե հարկային տեսչության կողմից հայտնաբերվում է մուտքային և ելքային հաշվիչների ցուցմունքների մինչև 5% և ավելի տարբերություն՝ տեղյակ է պահվում Չափագիտության ազգային ինստիտուտ՝ հետագա քայլեր ձեռնարկելու համար:

Պետք է փաստել, որ Չափագիտության ազգային ինստիտուտը խախտում չի արձանագրել, հետևաբար խախտում համարելն անհիմն է: Եվ վերջապես, անդրադառնալով կապարակնքման ժամկետին անհասկանալի է, թե որ օրենքով է սահմանվում կապարակնքման ժամկետների խախտման դեպքում ԱԱՀ-ի հարկման դաշտից անցումը հաստատագրված վճարի հարկման դաշտ:

Ելնելով վերոգրյալից՝ «Տիգհար» ՍՊԸ-ն խնդրում է անվավեր համարել ակտի 6-րդ կետն ամբողջությամբ:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև՝ Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ԿԱ ՊԵԿ նախագահի 28.11.2016թ. N1011536 հանձնարարագրի համաձայն՝ «Տիգհար» ՍՊԸ-ում կատարվել է բյուջեի հետ փոխհարաբերությունների և հարկային մարմնի կողմից վերահսկվող ՀՀ օրենսդրության առանձին պահանջների կատարման ճշտության ստուգում: Արդյունքում կազմվել է ՀՀ ԿԱ ՊԵԿ Արտաշատի ՏՀՏ 11.01.2017թ. N1011536 ակտը (այսուհետ նաև՝ Ակտ), որով լրացուցիչ վճարման է առաջադրվել ընդամենը 6.566.010 դրամ:

«Տիգհար» ՍՊԸ-ի գանգատը վերաբերվում է Ակտի 6-րդ կետով արձանագրված խախտմանը: Այսպես, Ակտի 6-րդ կետով մասնավորապես արձանագրվել է, որ համաձայն ՀՀ կառավարության 28.08.2008թ. N1101-Ն որոշմամբ սահմանված տեխնիկական կանոնակարգի 84-րդ, 119-րդ, 149-րդ և 150-րդ կետերի պահանջների՝ բնական գազի կոմպրեսացված վառելիքի լիցքավորման համար օգտագործվող բոլոր համակարգերը պետք է լինեն անվտանգ, չլինեն փոփոխված, հեռացված, փոխարինված և պետք է աշխատեն վկայագրի ու նախագծի տեխնիկական բնութագրերին համապատասխան: Բացի այդ, վերը նշված կառավարության որոշման պահանջներն ապահովելու նպատակով ՀՀ էկոնոմիկայի նախարարի 10.05.2011թ. N298-Ն և ՀՀ ԿԱ ՊԵԿ նախագահի 19.05.2011թ. N772-Ն համատեղ հրամանով հաստատված ավտոգազալիցքավորման ճնշակայանների (ԱԳԼԾԿ) կապարակնքման կարգի 2-րդ և 3-րդ կետերի պահանջների համաձայն՝ ԱԳԼԾԿ-ն շահագործելիս պետք է անցկացվի ստուգաչափում, իսկ ԱԳԼԾԿ-ի տնօրինությունն իր հաշվառման վայրի հարկային տեսչություն պետք է ներկայացնի ավտոգազալիցքավորման աշտարակի տեսակի հաստատման սերտիֆիկատը և յուրաքանչյուր աշտարակի համար ստուգաչափման մասին առանձին վկայականը: Ստուգման ընթացքում պարզվել է, որ կազմակերպությունը, խախտելով «Հաստատագրված վճարների մասին» ՀՀ օրենքի 59.8-րդ հոդվածի 2-րդ կետի, ՀՀ կառավարության 28.08.2008թ. N1101-Ն որոշմամբ հաստատված ԱԳԼԾԿ-ների տեխնիկական կանոնակարգի 84-րդ, 119-րդ, 149-րդ և

150-րդ կետերի, ինչպես նաև ՀՀ Էկոնոմիկայի նախարարի 10.05.2011թ. N298-Ն և ՀՀ ԿԱ ՊԵԿ նախագահի 19.05.2011թ. N772-Ն համատեղ հրամանով հաստատված ավտոգազալիցքավորման ճնշակայանների (ԱԳԼՃԿ) կապարակնքման կարգի 2-րդ և 3-րդ կետերի պահանջները, ինչպես նաև ՀՀ Էկոնոմիկայի նախարարի 14.01.2011թ. 9-Ա հրամանով հաստատված աղյուսակ 5-ի 4-րդ կետի պահանջները, 2015թ. մարտ և ապրիլ ամիսներին բաշխիչ աշտարակները շահագործվել են առանց ստուգաչափման վկայականների և կապարակնքման սխեմայի (վերջին ստուգաչափումը կատարվել է 12.03.2014թ. և ուժի մեջ է 12.03.2015թ., սակայն ստուգաչափվել է 10.04.2015թ.) և ՀՀ Էկոնոմիկայի նախարարության «Չափագիտության ազգային ինստիտուտ» չափագիտության ազգային մարմնի կողմից տրվել է N014096, 014097, 014098 և 014099 ստուգաչափման վկայականները, սակայն ընկերությունը 2015թ. մարտ և ապրիլ ամիսներին աշխատել է ընդհանուր հարկման ռեժիմով, ներկայացրել ԱԱՀ-ի հաշվարկներ այն դեպքում, երբ վերոհիշյալ գործունեության մասով ընկերությունը պետք է համարվեր հաստատագրված վճար վճարող:

Արդյունքում հաստատագրված վճարների գծով լրացուցիչ վճարման է առաջադրվել ընդամենը 5.831.900 դրամ:

Վերոգրյալի կապակցությամբ հարկ է նշել հետևյալը.

«Հաստատագրված վճարների մասին» ՀՀ օրենքի՝

- 7-րդ հոդվածի «իա» կետի համաձայն՝ հաստատագրված վճարի հարկվող օբյեկտ է համարվում ավտոտրանսպորտային միջոցների գազալցման (գազալիցքավորման) գործունեությունը,

- 59.8-րդ հոդվածի 1-ին մասի համաձայն՝ հաստատագրված վճար վճարողներ են համարվում գազալցման կայանների (կետերի) միջոցով ավտոտրանսպորտային միջոցների գազալցման (գազալիցքավորման) գործունեություն իրականացնողները,

- 59.8-րդ հոդվածի 2-րդ մասի համաձայն՝ օրենքի 9.2-րդ գլխի դրույթները չեն տարածվում ավտոտրանսպորտային միջոցների գազալցման այն կայանների (կետերի) միջոցով իրականացվող ավտոտրանսպորտային միջոցների գազալցման (գազալիցքավորման) գործունեության նկատմամբ, որտեղ, ՀՀ կառավարության սահմանած տեխնիկական կանոնակարգին համապատասխան, առկա են լիցքավորման բաշխիչ աշտարակներ:

ՀՀ կառավարության 28.08.2008թ. N1101-Ն որոշմամբ հաստատված տեխնիկական կանոնակարգի՝

- 84-րդ կետի համաձայն՝ բնական գազի կոմպրեսացված վառելիքի լիցքավորման համար օգտագործվող բոլոր համակարգերը և նրանց բաղադրիչները պետք է լինեն անվտանգ: Սա նշանակում է, որ դրանք պետք է մասնավորապես աշխատեն վկայագրի ու նախագծի տեխնիկական բնութագրերի համաձայն, համապատասխանեն «Ստանդարտացման մասին» ՀՀ օրենքով սահմանված պահանջներին,

- 119-րդ կետի համաձայն՝ ԱԳԼՃԿ-ում շահագործվող բարձր ճնշման անոթների արտաքին զննումը, պատերի հաստության չափերը, դրանց փորձարկումները, ինչպես նաև վկայագրումը, պետք է կատարվեն ՀՀ օրենսդրությամբ սահմանված կարգով՝ 2 տարին մեկ անգամ,

- 149-րդ կետի համաձայն՝ ԱԳԼՃԿ-ում շահագործվող բոլոր չափման միջոցները, հսկիչ-չափիչ սարքերը, որոնք տեղադրված են գազատարների և ագրեգատների վրա,

ենթակա են չափագիտական հսկողության և վերահսկողության՝ համաձայն «Չափումների միասնականության մասին» ՀՀ օրենքի,

- 150-րդ կետի համաձայն՝ յուրաքանչյուր ԱԳԼՃԿ պետք է ունենա կապարակնքման սխեմա և ԱԳԼՃԿ-ում գազի տեխնոլոգիական կորստի հաշվարկման մեթոդիկա՝ հաստատված չափագիտության ազգային մարմնի և հարկային պետական ծառայության կողմից:

- 152-րդ կետի համաձայն՝ ԱԳԼՃԿ-ում լիցքավորվող բնական գազի քանակի չափման համար օգտագործվող չափման միջոցները պետք է ապահովվեն բաց թողնված բնական գազի հաշվիչներով: Հաշվարկված բաց թողած գազի քանակի հարաբերական սխալանքը պետք է լինի ոչ ավել, քան 1%:

ՀՀ էկոնոմիկայի նախարարի 10.05.2011թ. N298-Ն և ՀՀ ԿԱ ՊԵԿ նախագահի 19.05.2011թ. N772-Ն համատեղ հրամանով հաստատված ավտոգազալիցքավորման ճնշակայանների (ԱԳԼՃԿ) կապարակնքման կարգի՝

- 2-րդ կետի համաձայն՝ ԱԳԼՃԿ-ն շահագործելիս անցկացվում է ստուգաչափում՝ օրենքով սահմանված կարգով,

- 3-րդ կետի համաձայն՝ ԱԳԼՃԿ-ի տնօրինությունը իր հաշվառման վայրի հարկային տեսչություն է ներկայացնում ավտոգազալիցքավորման աշտարակի տեսակի հաստատման սերտիֆիկատը և յուրաքանչյուր աշտարակի համար ստուգաչափման մասին առանձին վկայական,

- 12-րդ կետի համաձայն՝ եթե հարկային տեսչության կողմից հայտնաբերվում է մուտքային և ելքային հաշվիչների ցուցմունքների միջև 5% և ավելի տարբերություն՝ տեղի է պահվում Չափագիտության ազգային ինստիտուտ՝ հետագա քայլեր ձեռնարկելու համար:

«Վարչարարության հիմունքների և վարչական վարույթի մասին» ՀՀ օրենքի՝

- 5-րդ հոդվածի համաձայն՝ վարչարարություն իրականացնելիս վարչական մարմիններին արգելվում է միայն ձևական պահանջների պահպանման նպատակով անձանց ծանրաբեռնել պարտականություններով կամ մերժել նրանց որևէ իրավունք տրամադրելը, եթե նրանց վրա դրված պարտականությունները բովանդակային առումով կատարված են,

- 37-րդ հոդվածի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

- 43-րդ հոդվածի համաձայն՝ անձի և վարչական մարմնի փոխհարաբերություններում ապացուցման պարտականությունը կրում է անձը՝ նրա համար բարենպաստ փաստական հանգամանքների առկայության դեպքում, իսկ վարչական մարմինը՝ անձի համար ոչ բարենպաստ փաստական հանգամանքների առկայության դեպքում:

«Իրավական ակտերի մասին» ՀՀ օրենքի 2-րդ հոդվածի 5-րդ մասի համաձայն՝ անհատական ակտ է նույն հոդվածի առաջին մասում նշված մարմինների՝ իրենց լիազորությունների շրջանակում ընդունած իրավական այն ակտը, որն ունի ժամանակավոր կամ մշտական բնույթ, նախատեսված է մեկանգամյա կամ բազմակի կիրառման համար, չի պարունակում իրավական նորմ և սահմանում է վարքագծի կանոններ միայն դրանում ուղղակի անհատապես նշված (նախատեսված) ֆիզիկական կամ իրավաբանական անձանց կամ պետական կամ տեղական

ինքնակառավարման մարմինների կամ պետական կամ համայնքային հիմնարկների համար:

Քննարկվող հարցով եզրակացության հանգելու համար Հանձնաժողովը հաշվի է առնում նաև հետևյալ փաստական հանգամանքները՝

1) Ընկերությունը ՀՀ կառավարության 28.08.2008թ. N1101-Ն որոշման պահանջներին համապատասխան ունեցել է կապարակնքման սխեմա՝ հաստատված Չափագիտության ազգային մարմնի կողմից և հարկային մարմին է ներկայացրել ավտոգազալիցքավորման աշտարակի տեսակի հաստատման սերտիֆիկատն ու յուրաքանչյուր աշտարակի համար ստուգաչափման մասին առանձին վկայականը,

2) ԱԳԼԾԿ-ում շահագործվող չափման միջոցների չափագիտական հսկողության շրջանակներում ՀՀ Էկոնոմիկայի նախարարության «Չափագիտության ազգային ինստիտուտ» չափագիտության ազգային մարմնի կողմից տրվել են N014096, 014097, 014098 և 014099 ստուգաչափման վկայականները: Քննարկվող դեպքում ստուգաչափումը կատարվել է 12.03.2014թ., վկայականն ուժի մեջ է եղել մինչև 12.03.2015թ., սակայն հերթական ստուգաչափումը կատարվել է 10.04.2015թ.:

3) ԱԳԼԾԿ-ում շահագործվող չափման միջոցների չափագիտական հսկողության շրջանակներում ՀՀ Էկոնոմիկայի նախարարության «Չափագիտության ազգային ինստիտուտ» չափագիտության ազգային մարմնի կողմից խախտումներ չեն հայտնաբերվել: Ընկերությունն ապահովել է բնական գազի կոմպրեսացված վառելիքի լիցքավորման համար օգտագործվող բոլոր համակարգերի և բաղադրիչների անվտանգությունը (դրանք չեն եղել փոփոխված, հեռացված, փոխարինված կամ կորցրած իր սարքինությունը և աշխատել են վկայագրի ու նախագծի տեխնիկական բնութագրի համաձայն),

4) վկայականների ժամանակավոր բացակայությունը չի հանգեցրել համակարգերի տեխնիկա-տնտեսական ցուցանիշների շեղմանը, մասնավորապես՝ չի արձանագրվել մուտքային և ելքային հաշվիչների ցուցմունքների միջև 5% և ավելի տարբերություն:

Հիմք ընդունելով վերոնշյալ իրավական կարգավորումները և հաշվի առնելով սույն հարցին առնչվող փաստական հանգամանքները, Հանձնաժողովը գտնում է, որ Գանգատն այս մասով ենթակա է բավարարման հետևյալ հիմնավորումներով.

1) Ակտով արձանագրվել է, որ ընկերությունը խախտել է ՀՀ Էկոնոմիկայի նախարարի 14.01.2011թ. 9-Ա հրամանով հաստատված աղյուսակ 5-ի 4-րդ կետի պահանջները: Նշված հրամանով հաստատված է չափագիտական հսկողության և վերահսկողության շրջանակներում չափման միջոցների ստուգաչափման և վկայագրման պարբերականության ցանկն ըստ չափման միջոցների տեսակների: Մասնավորապես, հրամանով հաստատված աղյուսակ 5-ի 4-րդ կետով գազաբաշխիչ կայանների համար պարբերական ստուգաչափման համար նախատեսված է ժամկետ՝ տարեկան մեկ անգամ: Տվյալ դեպքում ընկերության կողմից չեն խախտվել անհատական իրավական ակտի պահանջները: Առաջին հերթին՝ նշված անհատական իրավական ակտով Ընկերության համար վարքագծի պարտադիր կանոններ չեն սահմանվել: Մյուս կողմից՝ լիազոր մարմնի կողմից (որի համար հրամանով սահմանված են վարքագծի պարտադիր կանոններ) ստուգաչափումը կատարվել է հրամանով հաստատված պարբերականությամբ,

2) «Հաստատագրված վճարների մասին» ՀՀ օրենքով հստակ սահմանված է, որ ԱԳԼԾԿ-ի գործունեության նկատմամբ հաստատագրված վճարի փոխարեն հարկման

ընդհանուր կարգը կկիրառվի, եթե ԱԳԼԾԿ-ում առկա են ՀՀ կառավարության սահմանած տեխնիկական կանոնակարգին համապատասխան առկա են բաշխիչ աշտարակներ: Օրենքի այդ պահանջի պահպանված լինելու համար պետք է պահպանված լինեն նաև ՀՀ կառավարության 28.08.2008թ. N1101-Ն որոշմամբ հաստատված տեխնիկական կանոնակարգի պահանջները: Տվյալ դեպքում ստուգաչափման վկայականը ուժի մեջ է եղել մինչև 12.03.2015թ., սակայն հերթական ստուգաչափումը կատարվել է 10.04.2015թ.: ՀՀ էկոնոմիկայի նախարարի 14.01.2011թ. 9-Ա հրամանով հաստատված աղյուսակ 5-ի 4-րդ կետով սահմանված՝ տարեկան մեկ անգամ պարբերականությամբ: Քննարկվող գործի փաստական հանգամանքների բազմակողմանի, լրիվ և օբյեկտիվ քննարկման արդյունքում, հաշվի առնելով, որ ԱԳԼԾԿ-ում շահագործվող չափման միջոցների չափագիտական հսկողության շրջանակներում խախտումներ չեն հայտնաբերվել, ապահովվել է բնական գազի կոմպրեսացված վառելիքի լիցքավորման համար օգտագործվող բոլոր համակարգերի և բաղադրիչների անվտանգությունը, վկայականների ժամանակավոր բացակայությունը չի հանգեցրել համակարգերի տեխնիկա-տնտեսական ցուցանիշների շեղմանը, մասնավորապես՝ չի արձանագրվել մուտքային և ելքային հաշվիչների ցուցմունքների միջև 5% և ավելի տարբերություն, Հանձնաժողովը գտնում է, որ Ընկերության վրա դրված պարտականությունները բովանդակային առումով կատարված են:

Միաժամանակ, Ակտով հաստատագրված վճարի գծով գանձման առաջադրված պարտավորությունների վերանայմամբ պայմանավորված ենթակա են վերանայման նաև Ակտի 1-ին կետերով համապատասխանաբար համախառն եկամտից կատարված նվազեցումները՝ դրան համապատասխան պակասեցման առաջադրված շահութահարկի գումարով, և պակասեցման առաջադրված ԱԱՀ-ի գումարները:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը


ո ր ո շ ու մ է՝

1. Անվավեր ճանաչել ՀՀ ԿԱ ՊԵԿ Արտաշատի ՏՀՏ 11.01.2017թ. թիվ 1011536 ակտի 6-րդ կետը:

2. ՀՀ ԿԱ ՊԵԿ Արտաշատի ՏՀՏ 11.01.2017թ. թիվ 1011536 ակտի 1-ին կետից նվազեցնել պակասեցման ենթակա շահութահարկի գումարն ամբողջությամբ՝ 10.828 դրամի չափով:

3. ՀՀ ԿԱ ՊԵԿ Արտաշատի ՏՀՏ 11.01.2017թ. թիվ 1011536 ակտի 3-րդ կետից պակասեցման ենթակա ԱԱՀ-ի գումարը (719.688 դրամ) նվազեցնել 429.688 դրամով (287.092 դրամ 20.04.2015թ. առաջացման ամսաթվով և 142.596 դրամ՝ 20.05.2015թ. առաջացման ամսաթվով):

Հանձնաժողովի նախագահ՝



Վ.ՄԻՐՈՒՄՅԱՆ